



Protocol dalla radunonza generala dalla CGS dils 20-11-2019, 09.00 ella claustra dallas soras dominicanas a Glion

approbaus a caschun dalla rg realisada via mail (muort la pandemia COVID 19) cun datum da partecipaziun dils 02-12-2020.

1. Beinvegni

Il president Francestg Friberg arva la radunonza e fa beinvegni a tut ils presents.

2. Preschientscha

Francestg supplichescha da nudar la preschientscha sin la gliesta che curseschi. Ils num dils annunziai seigien gia nudai. Ei basegni mo pli ina sottascripziun ni el cass indicau ina correctura. Persunas che figureschien buca silla gliesta sappien s'enscriver sin la davosa pagina.

Ina gliesta culs hosps ed ina gliesta cun las perstgisas vegn projectada e prelegida.

3. Approbaziun dalla gliesta da tractandas

La gliesta da tractandas vegn approbada unanimamein.

4. Elecziun da dus dumbravuschs

Sco dumbravuschs vegnan Gabriel Venzin e Marina Bearth elegi.

5. Presentaziun ed approbaziun protocol radunonza generala 2018

Il protocol ei vegnius tarmess per mail allas commembras ed als commembers sco era vegnius publicaus sin www.cgsurselva.ch. Ei vegn buca giavischau da preleger il protocol. Il protocol vegn approbaus senza midadas e senza cuntervuschs cun engraziar agl actuar.

6. Rapport presidial ed approbaziun

Nies president Francestg presenta siu rapport presidial. Il rapport cumplet seigi gia vegnius tarmess tier per mail sco era vegnius publicaus silla pagina d'internet.

Francestg resumescha aunc inaga igl impurtont cun agid dad ina presentaziun da power point. Il rapport cumplet ei allegaus egl appendix da quest protocol.

Aluis Hosang admitta in grond engraziament a Francestg per tut sia gronda lavur ch'el fa per la CGS, e damonda las presentas ed ils presents alla radunonza da mussar l'approbaziun cun alzar il maun. Il rapport presidial vegn approbaus unanimamein cun in ferm applaus.

8. Rapport dalla cassiera e dils revisurs ed approbaziun dil quen

entradas	11035.00	frs.
expensas	10150.50	frs.
gudogn	884.50	frs.
activas	1017.90	frs.

La cassiera Catarina Steger presenta il quen. Il quen vegn approbaus unanimamein suenter haver udiu il rapport dalla revisura da quen Andrea Monn. Il president engrazia alla cassiera sco era allas revisuras da quen per lur lavur.



Nossa cassiera Catarina presenta e declara silsuentar il preventiv 2019/20. Ella quenta cun entradas da 12'000 francs e cun expensas da 12'065.00 francs. Pia seresultass tenor preventiv ina pintga sperdita da 65.00 francs.

9. Elecziuns

Il president actual, Francestg Friberg, vegn reelegius cun in ferm applaus. Per igl actuar partent, Pieder Antoni Halter, elegian las presentas ed ils presents Adrian Cathomas da Laax. Ils ulteriurs consuprastonts, Catarina Steger, Aluis Hosang e Ricarda Caderas vegnan reelegi en globo.

10. Propostas/iniziativas dallas commembras / dils commembers:

Ei vegn fatg neginas propostas ord il ravugl dalla radunonza.

11. Fixaziun contribuziuns annualas

Las contribuziuns restan sco igl onn vargau.

12. Informaziuns

Collaboratura dalla LR

Alice Bertogg, promotura regionala dalla LR, informescha davart sia lavur e ch'ella seigi la persuna da contact per las scolas. David Flepp seigi siu collaboratur.

LR

Conradin Klaiss, il responsabel dalla LR per la formaziun, porta ils salids dalla *Ligia Romontscha* e dat enqual informaziun. El raqueta che la digitalisaziun hagi fatschentau pulitamein la LR sper il giubileum da 100 onns LR.

Ina applicaziun SIRI per romontsch, quei seig lur finamira. La LR vegli ch'ei detti era quei survetsch per Romontschas e Romontschs.

Il survetsch da SIRI duessi vegnir mess en pei pils idioms. Ord quei motiv basegni ei bia registraziuns da differents plidaders. Denter ils 16 ed ils 19 da schaner 2020 vegnien aschi bia vuschs sco pusseivel registradas.

Emilia ed ils quens

Tonja Pelican, oriunda da Lumbrein e sesenta a Turitg, ha creau il niev cudisch d'affons. Il cudisch porta il tetel: "Emilia ed ils quens". Tonja ha buca mo scret sezza il cudisch, mobein era fatg tut ils dessegn el cudisch.

Emilia ha grondas difficultads en matematica. Ella retscheiva lu agid dalla pedagoga curativa ed il tschaffen per ils quens retorna.

Tematicas sco discalculia, problems en scola, temas da disgir, ir entuorn cul turpetg, constellaziuns da famiglia, emigraziun, divorzi, etc. vegnien era avon el cudisch.

13. Varia

Francestg communichescha aunc entginas midadas da stanza per ils moduls dil suentermiezgi, ed annunzia il cant comunabel che vegni a suandar sut la direcziun da Flavia Walder suenter la radunonza generala.



Sco davos engrazia Francestg als presents ed allas presentas per la participaziun, allas referentas ed als referents per lur lavur, alla Casa da sentupada per la hospitalitad.

In engraziel special admetta Francestg allas consuprastontas ed als consuprastonts per la fetg buna e biala collaboraziun duront igl entir onn surdond a mintgin in pign regal personal.

Il president siara la radunonza allas 11:20.

igl actuar
Pieder Antoni Halter

Appendix: - Rapport presidial 2019



RAPPORT PRESIDIAL 2018/19

Per mauns dalla radunonza generala annuala dils 20.11.2019

1. Sesidas da suprastonza

Las commembras ed ils commembers da suprastonza dalla CGS (Catarina Steger, cassiera; Ricarda Caderas, assessura; Aluis Hosang, vicepresidente; Pieder Antoni Halter, actuar; Francestg Friberg, president) han salvau el decuors digl onn da gestiun 2018/19 en tut quarter sesidas (19.12.2018, 22.05.2019, 25.09.2019, 19.11.2019). Sper quellas sesidas dall'entira suprastonza han giu liug ulteriuras sesidas specificas, e sco pil solit numerus contacts per telefon e mail.

2. Activitads

La suprastonza CGS ei sededicada igl 2018/19 allas suandontas activitads:

- Evaluaziun dil Di da romontsch 2018
- Sviluppaziun ed organisaziun dil Di da romontsch 2019
- Mieds d'instrucziun romontschs
- Plan d'instrucziun 21
- Center linguistic online – CELION
- Center didactic romontsch online – CEDID
- Collaboraziuns dallas treis conferenzas scolasticas CGL, CRGC e CGS
- Collaboraziuns cun ulteriuras instituziuns ed uniuns parentadas culla CGS

3. Evaluaziun dil Di da romontsch 2018

Ils resuns dil Di da romontsch dils 28.11.2018 succedi a bucca sco era a scret (mail) ein stai fetg positivs. Resumaziun:

- La midada da realisar la radunonza generala igl avonmiezdi, ed ils luvratoris il suentermiezdi ei fruntada sin in fetg bien eco.
- Ei vegn dau igl impuls da repeter ils moduls "Ils Schuobacheclers" e "Dil graun al paun", essend igl interess staus aschi gronds che buca tuttas annunzias han saviu vegnir risguardadas sco stau giavischau.
- Plinavon vegn exprimiu il giavisch da cuntinuar aschibein culla purschida da cant/musica/moviment, sco era culla purschida en connex cun giugs el lungatg.
- Era il cant communabel ei fruntaus sin in bien eco e duei vegnir cuntinuaus.
- Plinavon vegn giavischau da drizzar l'entschatta e la finiziun dil di da maniera ch'ei seigi pusseivel da duvrar ils mieds da transport publics.

4. Sviluppaziun ed organisaziun dil Di da romontsch 2019

Las finamiras centralas dalla dieta ein da possibilitar inscunters en in ravugl romontsch ed il dar impuls e support alla scola romontscha. Quei sereflectescha era ella purschida dil Di da romontsch dils 20.11.2018 al qual rodund 155 persunas ein s'annunziadas.

Igl avonmiezdi ei organisau ina prelecziun litterara, la radunonza generala dalla CGS, e silsunter cant romontsch communabel. Suenter il gentar communabel che vegn medemamein purschius en claustra sespleigan paralellamein sis differents luvratoris. Il program detagliau digl entir di ei d'anflar sco appendix a quest rapport. Jeu engraziel da cor



a tuttase tuts ch' ein s' engaschai pil Di da romontsch 2019, en tuts speciala nossas menadras ed a nos menaders dils luvratoris: Andrea Veraguth, Andrea Monn, Edith Albin, Aurelia Bergamin, Patricia Cadruvi, Anna Jemmi, Adrea Kobler, Karin Demont, Flavia Walder, Monique Huonder, Jan-Andrea Bernhard, sco era all'atura Cornelia Vinzens (prelecziun litterara) ed alla Myriam Pelican (moderaziun dalla prelecziun litterara).

5. Mieds d'instrucziun romontschs

La realisaziun dils mieds d'instrucziun romontschs prospereschan e se presenta sco suonda.

Rom romontsch:

- Sin damonda dalla CGS, ed en vesta a quest rapport, informescha Rico Cathomas, menader dil project *Mediomatix*, suandontamein davart igl andament dallas lavurs dil niev mied d'instrucziun:

Sut il tetel *Mediomatix* (da *mieds idiomatics*) elaborescha la SAPGR per incumbensa dil Cantun Grischun (EKUD) novs mieds d'instrucziun da lungatg els idioms romontschs sursilvan, sutsilvan, puter e vallader. Il project cuoza sis onns (2016-2021). La finamira dil project ei da crear mieds d'instrucziun innovativs, cumpatibels cul PI21, en fuorma analoga e digitala per l'instrucziun romontscha ella 2. classa dil scalem primar entochen la 3. classa dil scalem secundar I.

Sco basa formala ein vegnidas svilupadas en in empren pass per tuts quater idioms grammaticas da scola unificadas e didacticadas. Quellas stattan a disposiziun dapi il matg 2019 en fuorma da cudischs (versiuns surluvradas), sco era e-books. Plinavon ei vegniu endrizzau in survetsch da support per damondas da diever dils e-books e vegniu svilupau ina pagina-web da project (www.mediomatix.ch). Cuors d'introducziun els novs mieds d'instrucziun han giu liug igl avrel 2018 a Cuera, il settember 2018 a Zernez ed il matg ed uost 2019 a Glion. Cull'entschatta digl onn da scola stattan ils cudischs da lavur stampai ed ils commentaris per il scolast/la scolasta digitala per la 2. e la 3. classa dil scalem primar e la 1. e 2. classa dil scalem secundar I a disposiziun. El mument vegnan ils mieds d'instrucziun dalla 4. classa dil scalem primar e dalla 1. classa dil scalem secundar I elaborai. Quels vegnan a star a disposiziun igl onn da scola 2020/21.

- Sin damonda dalla CGS, ed en vesta a quest rapport, informescha la schefa da fracziun *Mieds d'instrucziun tier igl Uffeci per la scola populara ed il sport*, Josy Künzler, ch'ei seigi en elaboraziun in concept per ina nova fibla en sursilvan la quala havessi da remplazzar il mied d'instrucziun "Mia fibla".

Rom natira, carstgaun e societad:

Il 2017 ha la Regenza grischuna giu decidiu da schar translatar per las scolas primaras dil tudestg els idioms ed en rg il mied d'instrucziun NaTec. La situaziun davart l'elaboraziun/publicaziun ei la suandonta:

- NaTec 3/4 ei cumpariu per l'entschatta digl onn da scola 2018.
- NaTec 5/6 ei cumpariu per l'entschatta digl onn da scola 2019. Sin damonda dalla CGS, ed en vesta a quest rapport, informescha la schefa da fracziun *Mieds d'instrucziun tier igl Uffeci per la scola populara ed il sport*, Josy Künzler, ch'il commentari online cullas materialias pils scolars, sco era las licenzas corrispundentas empustadas duessien suandar el decuors dallas proximas jamnas.
- NaTec 1/2 ei previus d'edir per igl onn da scola 2020.



Sin damonda dalla CGS, ed en vesta a quest rapport, informescha la schefa da fracziun *Mieds d'instrucziun* tier igl Uffeci per la scola populara ed il sport, Josy Künzler, che las previstas actualas per la sviluppaiziun da mieds d'instrucziun els ulteriurs roms seigien las suandontas:

- Rom MU (cant e musica) → buca planisau; eventualmein pusseivel a lunga vesta
- Rom AF (art figurativ) → buca planisau
- Rom ATT (art tecnic, art textil) → buca planisau
- Roms ERC (etica, religiuns e cuminonza; cun damondas dalla veta), ELT (economia, lavur e tenercasa; cun economia da casa), STS (spazis, temps e societads) (= geografia e historia) → In niev mied d'instrucziun cul num *Weitblick 1-6* seigi sin rucca. Quel savessi eventualmein cuvierer tuts treis roms ERC, ELT, STS. Schebein il mied vegni ad esser adattaus per translatar, ed en tgei fuorma ch'el sappi eventualmein vegnir applicaus, sappi vegnir giudicau pèrcu il mied seigi cumpariu.
- Rom MI (medias ed informatica) → La translaziun dil mied d'instrucziun inform@21 per la 5./6. classa cumpari el decuors dallas proximas jamnas. Ils cuors obligatoris pil 2020 seigien gia publicai.

En quest liug seigi menziunau il suandont material didactic cumpariu tier la CGS el decuors dils davos in, dus onns.

Mied d'instrucziun Filtric:

Il mied, cumpriu ils fegls da lavur online, sa vegnir retratgs tier la CGS. Ei setracta da 320 paginas fegls da lavur e da 190 illustraziuns.

Material didactic davart Dil graun al paun e Ils Schuobacheclers:

Ils dus elaborats ch'ei vegni presentai a caschun dil Di da romontsch 2018 en fuorma da luvratori, e che vegnan repeti uonn al DDR, san vegnir retratgs tier la CGS. Il material didactic se basa sin luvratori ch'ei d'anflar el *Museum Regiunal Surselva* a Glion. El cass ideal vegn il material didactic tractaus en connex cun ina viseta al MRS. En quest liug seigien tuts luvratori d'eveniment ch'il MRS porscha actualmein per affons numnai:

- Dil fil alla teila (1.-3. classa)
- Far lischiva e savun (1.-3. classa)
- Spassegiada alpestra cun far pischada (1.-6. classa)
- Tura d'affons cun guid (1.-6. classa)
- Paun sur la burnida (1.-6. classa)
- Ils Schuobacheclers (3.-6. classa)
- Memory Tour el marcau vegl da Glion (3.-6. classa)
- Pistregn, frina e paun (1.-6. classa)

6. Plan d'instrucziun 21

Cun igl onn da scola 2019/20 ei il P21 ius en vigur era per la 3. superiura.

Cunquei ch'ils mieds d'instrucziun romontschs dil cantun ein – malgrad ils progress – era vinavon buca avonmaun sco quei ch'els duessen e stuessen per ademplir las pretensiuns dil Plan d'instrucziun 21, ei la CGS era s'engaschada uonn per la realisaziun da tals, semettend en contact cul cantun, cul LEGR, culla LR, sco era cullas utliurius conferenzas romontschas.



7. CELION (Center linguistic online) e CEDID (Center didactic online romontsch)

Il davos onn ei staus sut l'enzenna dallas midadas. La pagina www.celion.ch ei vegnida sistida la fin digl onn 2018, cun quei ch'il programmader ed administratur dalla pagina Andy Reich (ict-atelier) ha sistiu igl abonnament pil server extern cul material da CELION. Las treis conferenzas romontschas havessen stuiu far investiziuns da manteniment ch'ellas han decidu da buca far. Damondas per lectorats ein per quei motiv vegnidas inoltradas directamein all'adressa dad inplus, aschia ch'il lectorat ha saviu vegnir garantius malgrad la sistida dalla pagina web.

En ina seduta dils 20.03.2019 han ils parsuras dallas Conferenzas priu ina decisiun davart il svilup ed igl avegnir da CELION, numnadamein tgei che capeti cul material didactic ch'era sin CEDID e CELION, e tgei s'ligiazium ch'ei vegni a dar per las differentas paginas web per la magistraglia, a basa dad in concept dad inplus. Concretamein: Las Conferenzas han surdau ad inplus l'incarica dad implementar il material didactic sin unterrichtsmaterial.ch, e da crear ina nova plattafuorma cumplessiva sco s'ligiazium per las differentas paginas web existents, e quei cun in tetg da 10'000.—frs, daners mess a disposiziun dil cantun Grischun per in tal intent e per semeglionts intents.

La fin zercladur 2019 ha la Fundaziun inplus sistiu la cunvegna cullas Conferenzas, quei sco consequenza da sia decisiun da serrar las portas dil biro a Glion. Per quei motiv ha Conradin Klaiss surpriu l'incumbensa da menar vinavon quei project ad interim en atgna reschia per mauns dallas Conferenzas.

8. Collaboraziuns dallas treis conferenzas scolasticas CGL, CRGC e CGS

Las treis conferenzas tgiran ina buna collaboraziun. Per regla s'entaupan ils presidents silmeins ina gada per onn. Uonn ei quei buca stau il cass. Plirs contacts han giu liug per mail e per telefon.

9. Collaboraziuns cun ulteriuras instituziuns ed uniuns parentadas culla CGS

La suprastonza dalla CGS ha era collaborau il 18/19 cun differentas instituziuns parentadas, en tut special cun:

- Ligia Romontscha
- Surselva Romontscha
- Lehrer Graubünden (LEGR)
- Departament per la scola populara dil cantun Grischun
- Museum Regional Surselva

10. Inplus

Dapi dus onns ha la CGS surdau al biro da survetschs *inplus* certas lavurs da secretariat. Cun finzercladur 2019 ha la Fundaziun *inplus* sistiu la cunvegna culla CGS per quei che inplus ha

priu la decisiun da calar cun sia purschida da survetschs. La suprastonza dalla CGS ha anflau ella persuna da Rita Wolf da Trun ina persuna capavla che cuntinuescha cullas medemas lavurs sco quei che *inplus* prestava, numnadamein: administraziun dallas adressas, tgira dalla pagina d'internet, lavurs da secretariat en connex cul Di da romontsch.



11. Fegl scolastic grischun (LEGR)

Era uonn ei la CGS stada envidada da contribuir alla ediziun dil fevrer e digl uost. Las contribuziuns ein stadas las suandontas:

- “Propi ina buna caussa! Etica, religiuns e cuminonza e nies mintgadi” (Andrea Cathomas; FS ediziun 02.2019)
- “A mintgin il siu” (Francestg Friberg; FS ediziun 08.2019)

12. Engraziaments

Jeu engraziel da cor a mias collegas da suprastonza Catarina Steger (cassiera), Ricarda Caderas (assessura), a mes collegas da suprastonza Aluis Hosang (vicepresident) e Pieder Antoni Halter (actuar) per tutta lavur prestada el decuors digl onn. En nossa suprastonza regia vinavon in fetg bien spért da lavur e da cameradia.

Engraziar en quest liug less jeu era a Silvana Caviezel-Lombridad *inplus*, sco era alla nova secretaria Rita Wolf (en uffeci dapi igl october 2019) per tutta lavur e per la fetg buna collaboraziun.

Jeu engraziel plinavon a tuttas persunas ed instituziuns per scadina collaboraziun culla CGS en favur dalla scola romontscha e bilingua!

Francestg Friberg, president CGS

Danis, ils 09 da november 2019

Appendix: Program Di da romontsch CGS 2019



DI DA ROMONTSCH CGS

20.11.2019 ELLA CASA DA SENTUPADA (CLAUSTRA), GLION

08:30 CORNETS E CAFFÈ (el foyer avon l'aula)

09:00-10:00 PRELECZIUN (aula)

Prelecziun ord il cudisch «*Nus savevan da nuot auter/Etwas anderes kannten wir nicht*» da e cun Cornelia Vinzens.
Moderaziun: Myriam Pelican Camenisch

10:00-11:00 RADUNONZA GENERALA ANNUALA (aula)

Tenor la gliesta da tractandas aschuntada

11:15-12:00 CANT (ell'aula)

Cant aviert cun Flavia Walder

12:15-13:30 GENTAR (en claustra)

Gentar

13:45-15:45 Moduls (en differentas stanzas)

MODUL 1 Il romontsch sco lungatg da scartira – engaschi per la formaziun avon 400-500 onns Referent: Jan-Andrea Bernhard Diember: max. 40 Publicum en mira: pdi da tut ils scalems	MODUL 2 Ils Schuobacheclers Referentas: Andrea Veraguth, Andrea Monn, Edith Albin Diember max.: 25 Publicum en mira: pdi 4.-6. primara, scalem superiur	MODUL 3 Dil graun al paun Referentas: Aurelia Bergamin, Patricia Cadruvi Diember max.: 30 Publicum en mira: pdi scoletta, pdi 1. e 2. primara, pdi da ATT, catechetAs
MODUL 4 Presentaziun pratica dil cudisch da canzuns Hoppelihoop Referentas: Anna Jemmi, Andrea Kobler Diember max.: 25 Publicum en mira: pdi da scoletta	MODUL 5 Presentaziun pratica dil cudisch da canzuns Hoppelihoop Referentas: Karin Demont, Flavia Walder Diember max.: 25 Publicum en mira: pdi 1. e 2. primara	MODUL 6 Giugs el lungatg Referenta: Monique Huonder Diember max.: 25 Publicum en mira: pdi da tut ils scalems

15:45 FIN

REMARCAS

- Annunzias: www.cgsurselva.ch (mintgin annunzia sesez)
- Davos termin d'annunzia: sonda, ils 02.11.2019
- Ils moduls dil suentermiezdi han per part in diember da participontas e participonts limitau. Ei vegn risguardau tenor il datum d'entrada.
- La contribuziun da 70.— frs (30.— frs contribuziun annuala 2019/2020, 40.— frs participaziun al Di da romontsch 2019) vegn incassada la damaun dalla CGS avon la radunonza generala all'entrada principala dalla claustra (naven dallas 08:00 tochen allas 08:45).
- La Casa da sentupada fa il medem mument ed el medem liug il suandont:
 - controlla che las annunzias per ils gentars corrispundien a quei ch'ei vegniu annunziau
 - repartiziun da duas sorts bons: bon verd per il caffè cun in cornet (5.— frs), bon blau per il gentar (25.— frs) per ils quals ei vegn incassau gest leu dalla Casa da sentupada.
- Las annunzias ein ligiontas, aschibein quei che pertucca il gentar sco era ils luvratoris. Per gentars e moduls annunziai buca pagai muort absenza nunperstgisada tochen il di avon l'occurrenza vegn tschentau quen.

Descripziun dils moduls (13:45-15:45)

Modul 1 → Il romontsch sco lungatg da scartira – engaschi per la formaziun avon 400-500 onns

Descripziun: La formaziun dils lungatgs romontschs ei ligiada fermamein cul concept da scolaziun el temps dalla refuorma (reformada e catolica). Suenter la presentaziun da novs mieds d'instrucziun suonda il luvratori che s'occupescha da tematicas specificas davart la historia ed il lungatg.

Referent: Jan-Andrea Bernhard

Diember participontas/participonts: max. 40

Publicum en mira: tuts scalems

Modul 2 → Ils Schuobacheclers

Descripziun: Affons avon 150 onns han giu per part ina tresta sort... Principalmein muort pupira han els stuiu bandunar lur patria ed ir la primavera el Schuob, ina cuntrada jastra cun lungatg jester, per gudignar il paun da mintga gi. Co ei quei iu? Tgei han els fatg? Nus vulein schar reviver ina historia ni l'autra, e sentir vid igl agen tgerp tgei ch'ei ha muntau dad ir egl jester.

Referentas: Andrea Veraguth, Andrea Monn, Edith Albin

Diember participontas/participonts max.: 25

Publicum en mira: 4.-6. primara, scalem superiur

Modul 3 → Dil graun al paun

Descripziun: *Dil graun al paun* ei in da plirs luvratori ch'il Museum Regional Surselva (MRS) porscha. Cun visitar quei luvratori san ils scolars "luvrar" sco d'antruras. Per cumpletar il luvratori ha ina gruppa elavurau material didactic multifar: films cuorts, historias, introducciuns per art tecnic e textil, fegls da lavur, fotografias, recepts, ina canzun eav. Il modul possibilitescha d'ina vart d'emprender d'enconuscher l'exposiziun ed il luvratori ch'il MRS porscha, sco era il niev material didactic. E quei tut a moda fetg pratica.

Referentas: Aurelia Bergamin, Patricia Cadruvi

Diember participontas/participonts max.: 30

Publicum en mira: pdi da scoletta, pdi da classa 1. e 2. primara, pdi da ATT, catechetAs

Modul 4 → Presentaziun dil niev cudisch da canzuns Hoppelihoop

Descripziun: En quei luvratori vegn presentau quater dallas 20 canzuns translataadas, mussond pusseivladads d'introducir e da luvrar cun ellas. Ei vegn surdau en fuorma da pupi a tuttas participontas e tuts participonts ina canzun e las ideas da luvrar. Sche giavischau sa vegnir acquistau alla fin dil luvratori il carnet ligiau per in prezi da cuors special.

Referent: Andrea Kobler, Anna Jemmi

Diember participontas/participonts max.: 25

Publicum en mira: pdi scoletta

Modul 5 → Presentaziun niev cudisch da canzuns Hoppelihoop

Descripziun: En quei luvratori vegn presentau quater dallas 20 canzuns translataadas, mussond pusseivladads d'introducir e da luvrar cun ellas. Ei vegn surdau en fuorma da pupi a tuttas participontas e tuts participonts ina canzun e las ideas da luvrar. Sche giavischau sa vegnir acquistau alla fin dil luvratori il carnet ligiau per in prezi da cuors special.

Referentas: Flavia Walder, Karin Peng

Diember participontas/participonts max.: 25

Publicum en mira: pdi 1./2. primara

Modul 6 → Giugs el lungatg

Descripziun: Instrucziun da romontsch ludica impulsada da giugs ord il sortiment dalla ludoteca Mustér e contuorn.

Referenta: Monique Huonder

Diember participontas/participonts max.: 25 personas

Publicum en mira: pdi da tut ils scalems



Radunonza generala CGS

Mesjamna, 20.11.2019, 10:00

Aula Casa da sentupada (claustra), Glion

Tractandas statutaricas

1. Beinvegni
2. Preschientscha
3. Elecziun da dus dumbravuschs
4. Approbaziun dalla gliesta da tractandas
5. Presentaziun ed approbaziun dil protocol radunonza generala 2018
6. Rapport presidial
7. Rapport CEDID (Center didactic online)
8. Rapport dalla cassiera e dils revisurs ed approbaziun dil quen
9. Elecziuns
10. Propostas commembras/commembers
11. Fixaziun contribuziun annuala
12. Informaziuns
13. Varia

Remarcas:

- Pert. tractanda 5: Il protocol dalla radunonza generala dils 28.11.2018 ei publicaus sin cgsurselva.ch
- Pert. tractanda 6: il rapport presidial 2018/19 vegn publicaus sin cgsurselva.ch
- Pert. tractanda 9: elecziun suprastonza (abdicaziun dad in suprastont)